

新淦縣志卷十四

武事 目錄四條

歷代駐師 征戰 堵禦 險要



新淦縣志卷十四 新編

武事

天生五材民並用之淦當閩粵之衝豪傑割據而爭者史不絕書

聖人作觀廓清草竊銷鑄劍戟轅童壤叟莫不抃舞乎康衢謳歌乎

盛世矣作武事志

漢

元鼎六年冬漢破番禺樓船將軍僕上書願請引兵擊



東粵上以士卒勞倦不許罷兵令諸校畱屯豫章梅嶺待命 漢書閩粵王傳

元鼎五年秋主爵都尉楊僕為樓船將軍出豫章下橫浦 漢書南粵王傳

三國

建安四年江表傳曰時丹陽僮芝自署廬陵太守策畱賁弟輔領兵住南昌策謂賁曰兄今據豫章是扼僮芝咽喉而守其門戶矣但當伺其形便因令國儀杖兵而進使公瑾為作勢援一舉可守也後賁聞芝病即如策

計周瑜到巴邱輔遂得進據廬陵 吳志

建安四年策欲取荊州以瑜為中護軍領江夏太守從攻皖拔之復進潯陽破劉勲討江夏還定豫章廬陵畱

鎮巴邱 吳志周瑜傳

松之案孫策於時始得豫章廬陵尙未能得定江夏瑜之所鎮應在今巴邱縣也與後所平巴邱不同

黃武五年權攻石陽與以地主使所部將軍鮮於丹帥五千人先斷淮道自帥吳碩張梁五千人為軍前鋒降高城得三將大軍引還權詔使在前住駕過其軍見與

新治縣志 卷十四
軍陣整齊權嘆曰初吾憂其遲鈍今治軍諸將少能及者吾無憂矣拜揚威將軍封沙羨侯

吳志

寶鼎二年春大赦右丞相萬彧上鎮巴邛

吳志

梁

壬戌大同八年春正月安城郡民劉敬躬挾左道以反內史蕭說委郡東奔敬躬據郡進攻廬陵取豫章妖黨逆至數萬前逼新淦柴桑二月戊戌江州刺史湘東王諱遣中兵曹子郢討之三月戊辰大破之擒敬躬送京師斬於建康市

梁書本紀

大同八年安成人劉敬躬挾妖道聚黨攻郡內史蕭說棄城走賊轉寇南康廬陵屠破縣邑有眾數萬人進寇豫章新淦縣南中久不習兵革吏民推擾奔散或勸綰宜避其鋒綰修城隍設戰備募召勇敢得萬餘人刺史湘東王遣司馬王僧辯帥兵討賊受綰節度旬月間賊黨悉平

梁書張綰傳

大清二年秋八月鄱陽王範密啟侯景謀反不報冬十

月侯景襲譙州執刺史豐城侯泰

範之子

十一月江州刺

史當陽公大心入援西豐公大春新淦公大成入援敗

績侯景擒大春十二月衡州刺史韋粲至廬陵舉兵入
援豫章書

大寶二年正月新吳余孝頃舉兵拒侯景景遣于慶攻
之不克六月孝頃遣兄子僧重將兵救鄱陽于慶走還
豫章復走江州據郭默城王僧辯乘勝下湓城陳霸先
帥所部三萬人將會之屯於巴邱西軍乏食霸先有糧
五十萬石分三十萬石以資之八月僧辯前軍襲于慶
慶棄郭默城走豫章書

太平二年蕭勃舉兵反遣僞帥歐陽頎傅泰勃從子孜
爲前軍南汀州刺史余孝頃以兵會之詔平西將軍周
文育平南將軍侯安都等率眾軍南討戊子徐度至合
肥燒齊船三千艘癸巳周文育軍於巴山生獲歐陽頎
三月庚子文前軍丁法洪於墟口生俘傅泰蕭孜余孝
頃軍退走梁書紀

陳

天嘉元年九月癸丑彗星見周將獨孤盛領水軍將趨
巴湘與賀若敦水陸俱進大尉侯瑱自潯陽往禦之辛
酉遣徐度率眾會瑱於巴邱十月侯瑱襲破獨孤盛於

楊葉洲盡獲其船艦

陳書紀

李遷仕之據大阜高祖命文育擊之又遣杜僧明來援別破遷仕水軍遷仕衆潰不敢過大阜直走新淦

陳書

周文育傳

蕭勃舉兵踰嶺詔文育督衆軍討之時新吳洞主余孝頃舉兵應勃遣其弟孝勤守郡城自出豫章據石頭勃使其子孜將兵與孝頃相會又遣其別將歐陽頎頓軍苦竹灘傅泰據墟口城以拒官軍官軍船少孝頃有舩艦三百艘艦百餘乘在上牢文育遣軍主焦僧度羊柬

潛軍襲之悉取而歸仍於豫章立柵時官軍食盡欲退還文育不許乃使人間行遺周迪書約爲兄弟并陳利害迪得書甚喜許饋糧餉於是文育分遣老小乘故舩舫沿流俱下燒豫章所立柵僞退孝頃望之大喜因不設備文育由間道信宿達芋韶芋韶上流則歐陽頎蕭勃下流則傅泰余孝頃文育據其中間築城饗士賊徒大駭歐陽頎乃退入泥溪作城自守文育遣揚威將軍周鐵武與長史陸山才襲頎擒之於是盛陳兵甲與頎乘舟而宴以巡傅泰城下因攻泰尅之

陳書周文育傳

黃法氈字仲昭巴山新建人也少勁捷有膽力步行日三百里為鄉閭所憚侯景之亂於鄉里合徒眾太守賀詡下江州法氈監知郡事陳武帝將踰嶺入援建鄴李遷仕作梗中途武帝命周文育屯西昌法氈遣兵助文育時法氈出頓新淦縣景遣行臺于慶來襲新淦法氈拒戰敗之太平元年割江西四郡臨川安城豫章巴山置高州以法氈為高州刺史鎮巴山蕭勃遣歐陽頎來攻法氈破之陳書黃法氈傳

侯景之亂高祖克元景仲仍渡嶺援臺平蔡路養李遷仕穎皆有功歷平固遂興二縣令高祖進軍頓西昌以穎為巴邛縣令鎮大阜督糧運下至豫章以穎監豫章郡陳書胡穎傳

周敷字仲遠臨川人高祖受禪王琳據有上流余孝頃與琳黨李希欽南史作孝等共圍周迪敷大致人馬以助於

迪迪擒孝頃等敷功居多熊曇朗之殺周文育據豫章將兵萬餘人襲敷徑至城下敷與戰大敗之追奔五十餘里曇朗單馬獲免盡收其軍實曇朗走巴山郡收合餘黨敷因與周迪黃法氈等進兵圍曇朗屠之陳書周

敷傳

永定三年王琳遣將曹慶攻周迪敗之文育退據金口曇朗因其失利殺文育而并其眾周敷擊破之曇朗單

騎奔巴山

綱目

熊曇朗南昌人侯景之亂聚少年據豐城縣爲柵築黠奴盜多附之梁元帝以爲巴山太守及侯瑱鎮豫章曇朗外示服從陰欲圖瑱侯方見之反鎮也曇朗爲之謀主瑱敗曇朗獲瑱馬仗子女甚多及蕭勃踰嶺歐陽頔爲前軍曇朗給頔共往巴山襲黃法氈又報法氈期共

破頔約曰事捷與我馬仗及出軍與頔犄角而進又給頔曰余孝頃欲相掩襲須分畱奇兵甲仗旣少恐不能濟頔乃送甲三百領助之及至城下將戰曇朗僞北法氈乘之頔失援狼狽退衄曇朗取其馬仗而歸時巴山陳定亦擁兵入寨曇朗僞以女妻定子謂定曰周迪余孝頃不願此婚須以疆兵來迎定乃遣精甲三百并土豪二十人往迎旣至曇朗執之收其馬仗並論價責贖

陳書熊曇朗傳

周文育攻余孝勸於豫章曇朗出軍會之文育失利曇

朗乃害文育以應王琳盡執文育所部諸將據新淦縣帶江爲城王琳東下世祖徵南川兵江州刺史周迪高州刺史黃法蕤欲沿流應赴曇朗乃據城列艦斷遏迪等與法蕤因帥南中兵築城圍之絕其與琳信使及王琳敗走曇朗黨援離心迪攻陷其城虜其男女萬餘口曇朗走入村中村民斬之傳首京師

陳書熊曇朗傳

隋

平陳之役以舟師自蘄水趨九江晉王已平丹陽世積移書告諭陳江州司馬黃偲棄城遁世積至廬陵太守

蕭廉巴山太守王誦並詣世積降

隋書王世積傳

唐

懿宗時鍾傳起豫章以其相彭玕爲吉州刺史楊行密下南昌玕不從密攻之逆戰象牙潭不利乃立寨於此

卽楓岡寨

與道士姓劉者助守拒密道士死玕亦敗

舊志

五代

十二月虔州刺史盧光稠有疾以位傳譚全播全播不受光稠卒其子延昌來奔喪全播立而事之王遣使拜延昌虔州刺史延昌受之復因楚通梁曰我受淮南官

以緩其謀耳終當爲朝廷經畧江西梁以延昌爲鎮南
畱後是冬淮南節度判官嚴可求請置制置使於新淦
縣遣兵戍之以圖虔州每更番輒潛益其兵虔人不覺
也十國春秋

宋

淳化間時沿江多賊命督江南水運因捕寇盜行及臨
江軍擇驍卒孥輕舟夜伺其出沒獲賊百餘悉梟其首
宋史楊允恭傳

余鄉新修寺古伏魔寺也舊邊大江今移置山中岳忠

武王飛曾駐兵馬畱詩壁間云云

浣水續談

元

至正壬辰十二年紅巾賊陷臨江戍卒劉天祐會淦義
民鄒民用樹柵於淦以拒之

舊志

十九年六月新淦寇鄧克明擒殺劉世英據崇仁樂安
安仁人王溥據金谿友諒以克明爲右丞據撫州

元撫

州志

二十一年十一月僞漢右丞鄧克明遣其員外羅天錫
以分省印及撫州建昌臨江汀州四路南豐寧都富州

三州樂安臨川等十八縣印詣鄧愈降愈畱克明於軍中令其弟志明還新淦收其部曲克明請往九江謁見愈以兵送之中途逃歸新淦明年於龍興城下被執豫章書

二十二年正月太祖幸南昌胡廷瑞率祝宗康泰等迎謁以鄧愈爲江西行省鎮南昌二月太祖率胡廷瑞等還建康祝宗康泰行至女兒港遂叛道掠布商船爲旗反兵劫南昌知府葉琛迎戰死之鄧愈倉卒以數十騎出走數與賊遇愈窘甚連跳跨三馬馬輒踣幾不免最後得養子所乘馬走還建康徐達聞變旋師赴之宗至新淦爲鄧志明所殺泰走廣信以廷瑞甥特宥之南昌復定 明史紀事

二十四年二月熊天瑞尙據贛州八月命常遇春鄧愈率兵討之愈與遇春合兵平臨江之沙坑麻嶺牛陂諸寨執僞知州鄧志明送建康及其兄克明俱伏誅 明史紀事

都督朱文正遣叅政何文輝指揮薛顯討新淦鄧仲濂

薛顯傳 斬之 大志

作仲濂

文輝以天寧翼元帥守寧國進江西行省叅政數攻江西未下州縣討新淦鄧仲廉斬之援安福走饒鼎臣平山尖寨從徐達取淮東復從下平江

明史何文輝傳

明

宣德九年陳本深擢知吉安府與况鍾等同受勅十年三月樂安大盜曾子良據大盤山眾萬餘本深設伏破之斬子良

陳本深傳

正德六年夏四月贛賊陷新淦執叅政趙士賢命左都御史陳金總制江西軍務率兵討之

明書本紀

六年九月廣東福州流賊三千餘人入永豐縣知縣朱璉逃去遂破樂安新淦知縣申惠等被執都御史陳金調兩廣土兵分道勦捕

大志

正德壬申土寇倡亂邑東南數十里悉爲巢穴邑侯劉天錫奏請大兵討平之

舊志

甲戌九年擊臨川賊斬其魁遣叅將李隆擊新淦賊賊踞萬山中僭稱王者八年隆等深入悉就擒俘斬千七百餘人錄功進諫右都御史巡撫如故

俞諫傳

正德十四年六月命勘福建叛軍行至豐城而寧王宸

濠反知縣顧佖以告守仁急趨吉安與伍文定徵調兵食治器械舟楫傳檄暴宸濠罪俾守令各率吏士勤王兵會於樟樹鎮知府臨江戴德儒袁州徐璉贛州邢珣等知縣新淦李美泰和李揖萬安王冕各以兵來會合八萬人號三十萬乙卯遇於黃家渡賊大潰丙辰復戰賊復敗退保樵舍聯舟爲方陣盡出金寶犒士明日宸濠方晨朝其羣臣官軍奄至以小舟載薪乘風縱火焚其副舟妃婁氏以下皆投水死宸濠舟膠淺倉卒易舟遁王冕所部兵追執之李士實劉養正及降賊按察使

楊璋等皆就擒南康九江亦下凡三十五日而賊平

明

史王守仁傳

萬曆三年夏六月淦賊白晝渡河殺官兵

嘉靖辛酉夏倭寇毒閩廣惡少乘時煽亂流劫郡邑六月迫淦城邑尹樂舜賓集鄉紳蕭克良等請兵拒之毒矢中賊首賊退

天啟五年乙丑賊越城劫新淦東門當舖斬北關出

崇正二年己巳賊入新淦城劫南門當舖越關出

九年丙子二月十二賊劫新淦廖宅斬秀峯門出

十二年六月新淦大盤山盜熾橫劫鄉村撫院發清淦
峽樂安四邑合兵會勦民告流移

國朝

順治四年五月金聲桓王得仁變亂六月初三東土乘
勢揭竿破淦城冬固山譚泰復之
以上俱舊志

關津目錄十條 附二條

杯山

橋梁 附

大坑

津渡 附

中洲

蘆嶺

麻嶺

小廬山

樂門嶺

圖沙均

山管峽

洞口

新淦縣志卷十五

關津

扼險守要以戒不虞以別其衣服語言之同異而奸
宄攘竊無所容是以權關行而民無嗟怨懷遠之經
也保境息民之政也作關津志

杯山距縣東六十里宋紹興間設巡檢司尋廢洪武四
年邑令曹哲請復設巡檢一員弓兵三十名建衙藍橋
後因桐江地連豐樂盜賊往來崇禎七年奉守道黃都
院解檄縣設巡檢鎮守要地邑令劉拯捐俸遷建城上

大坑距縣東七十里越此爲桃嶺宋源抵樂安界
中洲距縣東五十里入河源嶺抵樂安界

蘆嶺距縣東三十里入中洲大坑麻嶺要路

麻嶺距縣東八十里

小廬山距縣東北八十里南接樂安北抵豐城界

樂門嶺距縣東四十里入拿埠曹山峽抵永豐界

圓沙坳距縣西十八里越此藍塘抵新喻界

山管峽距縣西二十里抵新喻界

洞口距縣西二十里越此爲石嶺抵峽江界

橋梁附

蘭陵橋附迎春門內五水灤注聚巽蕭世建修

端平橋迎春門外舊名壕缺端平七年建故名

廣濟橋在端平橋上百步許俗呼顯濟

賓陽橋在賓陽門外洪武年彭忠孝修

瓦橋在治東南七里

黃竹橋在治東南十里

神政橋在治東南二十里有亭何昭五建

湄湘橋在治東二十五里碧流潺湲澄練如帶淦名水

也

靈鄉橋在治東三十里東陳建

楓落橋在治東六十里

普濟橋在治東六十里

拿埠橋在治東南六十里

黃家橋在治東黃仁律修

瓦橋路亭太平鄉下團國學鄒魯邑庠鄒勳建

神鎮橋亭鄒魯鄒勳建

以上俱治東

惠政橋在向明門外高四十七尺闊二十八尺長二十

一丈起三拱上覆以長亭衛以欄楯紹定庚寅贛寇燬

亭淳祐乙巳修乙亥復燬邑憲副周謨記順治丙戌兵

燬邑令高榮重建

通遠橋去惠政橋百餘步東泄流桂湖水嘉靖年重修

邑知州吳潮記

南津橋在祥符觀前舊名絳橋後廢崇正庚午邑孝廉

陳志泰修復圯

國朝嘉慶辛未監生李學優重修

據冊新編

中溪橋在治南十里中溪

桁橋在治南二十里

秀溪橋舊名石砌秀溪之水經此故名

館市橋在治南四十里卽楓陂今屬峽江

富春橋在治南十五里孫家坊

官路橋在治南十里孫氏建以上俱治南

李仁橋在治西五里邑人李仁建

大橋在治西三里章岡李仁建四十七八都通衢

廖墟橋在治西十里

聶家橋在治西界埠

湖田橋在治西南五里邑人饒翼之建

坑口橋舊在治西北八里當舖道水衝啣半圯天啟丁

卯邑令周文允暨貳守徐鳴臯先後改修移稍東數武

建亭橋畔更名平政亭邑水部郎聶心湯記崇禎壬午

陳令以運復鳩工磊砌有記

國朝順治間潘令岵重建乾隆間周尙禮重修

湖東橋在治西北八里

楊家橋在治西北五里大學生廖發端建

清湖橋在治西二十五里白馬蕭祠建

黃潭橋在治西三十里鞞坊地方

聯濟橋在治西十五里一在渡頭邑人黃國瑞建

通津橋在治西二十里長鱗地方廖莊記

以上俱治西

北門橋潮天門外濠上居民積塊填壅邑令劉極疏治

見城池志

金水橋在治東北三十里

望仙橋在治北方門口舊名小石橋韶州太守方信儒
建

知政橋邑人聶棠建宋淳熙十年邑令鄭桌題名嘉靖

三十年重建俗呼棠公橋有上下二橋今存二少保曾
同享有記

升岳橋在鳳凰山下東岳廟前顏康熙三年復建

鵝頸橋在治北二十里

洪陂橋在治北三十里

灌溪橋在治東北十里

維摩橋俗呼夷婆橋在治北二十五里

藍橋在治東北鄧元秀建

文會橋在治東北三十五里邑人黃文會修

板埠橋在治東北四十里 以上俱治北

以下據省志補遺

平津橋在惠政橋南

蛇坑橋在治南三十里

步橋

藤橋縣南十五里

石砌橋卽秀溪橋所改

藍步橋

以下據呈新編

鎮江橋在五都桃溪康熙五十四年邑文庠鄉飲介賓
鄧攸慶倡修

溧江橋在五都溧江市乾隆癸卯李芝華芝芳捐資重
修嘉慶庚申貢生李嘉棟捐修道光三年合鄉重修
金橋在五都庄里乾隆丁卯貢生李如炎捐建

長春橋在四都七琴乾隆丙子洪立人洪朝宗捐建淦
敘諭章文性序

楊門橋在一都航源乾隆四十一年監生劉宗顯捐建
龍江橋在一都龍江嘉慶三年監生劉宗顯捐建

新治縣志 卷之三
曾家陂橋在二都會家陂墟嘉慶庚申舉人陳日芳倡
修重建奉新教諭程世鎮記

橫田橋在七都橫田陂嘉慶庚辰監生陳清汪等倡修
東陂橋在七都東陂嘉慶庚辰監生陳清汪等倡修
石龍橋在六都埭頭嘉慶丙寅任日忠等倡修重建
賽口壽母橋在治外二里嘉慶二十一年陳受祿捐修
壽圯陳孫氏嗣修
黃土橋在七都下荒陂邑廩陳權等倡修

津渡附

大江十四渡小江六渡補一渡

界埠對縣治西北二門俗呼爲西河口北河口乾隆五
十六年監生楊濱建渡船五隻義渡十七年至嘉慶十
二年撤止臨江府主姚公名任道獎以望隆舟楫
官洲渡對江爲南河口

藍坡渡在治南十里

泥江口渡在治南十里內通峽江馬埠淦治東鄉百數
十里賈人販運稻穀必經此以達大江明邑令王立穀
倡造浮橋尋廢明台州守楊爲棟記

車頭渡在治南二十里

楊家渡在治東南三十里今移

坑口渡在治北三里

城頭渡在治北五里

莒洲渡在治北十里有上下二洲明萬歷庚戌布衣謝敬惕會臨吉紳士疏募培樹植果資給義渡洲人耕種

清沂渡在治北二十里

石口渡在治北二十五里對江白馬

新市渡在治北三十里對江曾家洲

大洋洲渡在治北三十里英佑侯祠前

上沙湖渡在治北四十里

婁家渡在治北四十三里

李家河渡在治北四十里橫河口內春夏水溢則循舟以達於郡冬水涸成路不假濟渡今其河築隄渡廢

蓮湖渡在治北四十里會丁家渡灘頭卽新喻入袁河

饒家坊渡在治北四十五里卽硯子洲袁河

丁家渡在治北四十里屬官渡通衢

黃家園渡在治北三十五里

以下依省志補遺

城口渡去藍坡一里

新淦縣志卷十六

驛鹽 目錄十條

驛舍 驛遞 舖遞 南路 北路

鹽原額 實額 粵鹽 浙鹽 淮鹽

新淦縣志卷十六

驛鹽

宋稱驛舍爲皇華館金川皇華館在縣澄江門外隔江對岸界埠野廬候人備極安妥內地公文外番貢表送往迎來何以畀之置郵傳命可弗講哉作驛站志

驛

金川驛舊在界埠嘉泰時縣令鄭如岡建上通吉下抵臨明設站船五隻水夫五十名

嘉靖庚戌縣令彭輅改建於治北金水亭嗣後寇毀甲寅縣令黃仁惠修葺舊驛改爲金川公館

萬歷丙辰巨濤蕩圮縣令黃立穀重修邑博學饒質善記

國朝康熙初年邑令董謙吉改建馬號於縣堂之右

乾隆三十五年邑令敏德詳請改建驛號於界埠即今之金川驛

驛遞

上通峽江縣玉峽驛計七十里

下達清江縣瀟灘驛計六十里

金川驛

原額站夫一百名雍正十年奉文裁減二十名存留站夫八十名每名日支工食銀三分歲共支銀八百六十四兩遇閏加銀七十二兩仍扣小建起解

原額驛馬三十匹乾隆二十四年奉文裁減五匹乾隆

三十九年奉文抽馬一匹撥歸袁州府宜春縣存留驛

馬二十四匹每匹每日工料銀八分歲共支銀六百九

十一兩二錢遇閏加銀五十七兩六錢仍扣小建起解

原額馬夫九名乾隆二十四年奉文裁減二名存留馬

夫七名每名日支工食銀三分歲共支銀七十五兩六

錢遇閏加銀六兩三錢仍扣小建起解

原額驛夫二名每名日支工食銀二分歲共支銀一十

四兩四錢遇閏加銀一兩二錢奉文全裁起解

原額舖兵三十三名每名日支工食銀二分歲共支銀

二百三十七兩六錢遇閏加銀一十九兩八錢仍扣小

建起解

額設應付廩給口糧銀二十兩按年除應付京粵往來

領有勘合火牌差使之外所有餘剩銀兩歸併裁解夫

馬等款銀兩解歸藩庫報部

原額水驛紅座船銀六百兩奉文全裁起解

舖遞

宋有七舖

崇仙舖

柘橋舖

秀峯舖

白卓舖

分界舖

豐陂舖

安國舖

明建舖十三

崇仙舖

在譙樓內

楓林舖

桁橋舖

龍岡舖俱在治東

堪竹舖

新移舖

灘頭舖

留坊舖俱在治西

餘五舖分隸峽

國朝建舖八

北路

崇仙總舖至

堪竹舖五里至

新移舖十里至

灘頭舖五里至

留坊舖十五里出境至清江縣渚塘舖

南路

過河至崇仙總舖八里至法華舖七里至

藍坡舖七里至蓮花舖十五里出境至峽江縣象口舖

未分峽時舖在治東自分峽建縣後置郵俱從水西走

遞上抵峽江象口舖下抵清江渚塘舖

鹽

鹽人掌鹽之政令祭祀賓客之供凌雜米鹽之務所出非一不僮煮海之利也信州只食浙鹽南贛則銷粵引計其道里時其往來平其貴賤按引以知其數

新治縣志卷之二
鹽政之經也作食鹽志

唐

乾元元年劉晏上鹽法輕重之宜以鹽吏多則州縣擾
出鹽鄉因舊監置吏亭戶糴商人縱其所之去鹽遠者
有常平鹽每商人不至則減價以糴民官收厚利而人
不知

唐書

貞元四年包佶爲汴東水陸運兩稅鹽使許以漆器瑋
瑁綾綺代鹽價雖不可用者亦高估而售之廣虛數以
罔上亭戶冒法私鬻不絕巡捕之卒遍於州縣鹽估益

貴商人乘時射利遠鄉貧人困高估至有淡食者巡吏
既多官冗傷財當時病之其後軍費日增鹽價寔貴同
上

宣宗擇嘗更兩畿輔望縣令爲監院官戶部侍郎裴休
爲鹽使上鹽法八事其法皆施行兩池權課夫增

同上

元豐舊志不許諸路以官船迴載爲轉運司之利許人
任便用鈔請鹽船載於所指州縣販易而出賣州縣用
爲廣額

同上

元豐三年章惇既參有郊直者迎合惇意推倣湖南之

法迄運廣鹽於江西卽遣蹇周輔往江西相度周輔承望惇意請罷運淮鹽通般廣鹽一千萬斤於江西虔州南安軍復均淮鹽六百一十六萬斤於洪吉筠袁撫臨江建昌興國軍

宋史

元符初楚州城鹽歲煮四十一萬七千餘石通州豐利鹽四十八萬九千餘石泰州海陵鹽如臯倉小海場六十五萬六千餘石給本州及江南之廬和舒蘄黃州無爲軍江南之江寧府宜洪袁吉筠江地太平饒信歙撫

州廣德臨江軍

宋書

崇寧解鹽通行地甚寬或請錢於京師每鈔六千二百登時給與但輸頭子等錢數十而已以此所由州縣貿易者甚衆後蔡京始變法俾商人先輸錢請鈔赴產鹽郡授鹽

同上

紹定年間以待御史李知孝創立鹽竈端平二三年之間鹽額積虧一百餘萬貸民食貴鹽公私俱病有旨專以興復鹽額收買散鹽爲務

宋史

元世祖世瀕海州郡鹽場差官主治差鹽亭戶丁煮鹽鹽商於各州府運司買引令其入錢縣官收市緣吏胥

為奸民甚苦之事尋罷復令富商收市 同上

元統二年御史臺備監察御史言居民繁盛鹽不可闕

大德七年河間運司兼辦每歲存留鹽數散之米舖從

其發賣其法屢易至元元年各州縣戶口額辦鹽課其

陝西運司官不思轉運之方每年豫期差人分道賣引

遍散州縣甫及旬月杖限追鈔不問民之有無竊照諸

處運司之例皆運官召商發賣 元史

至正二年中書右丞相脫脫平章鐵木兒塔識等奏食

鹽害民江淞行省走官運司官屢言擬合欽依世祖皇

帝舊制除近鹽地十里之內令民認買革罷見設鹽倉

綱運聽從客商赴運司買引就場支鹽許於行鹽地方

發賣 同上

明太祖初起即立鹽法置局設官令商人販鬻二十取

一以資軍餉自宏治及世宗鹽政屢更 明史

嘉靖二十年江西故行淮鹽三十九萬引後南安贛州

吉安改行廣鹽惟南昌諸府行淮鹽二十七萬引既而

私販盛行袁州臨江瑞州則私食廣鹽撫州建昌私食

福鹽於是淮鹽僅行十六萬引 同上

國朝鹽務籌畫周密行鹽之省其水陸挽運必計其道里時其往來平其貴賤俾商無滯引民免澹食以聽於鹽政行鹽符信由部給引鹽政受而布之商其受鹽於場掣鹽於批驗所轉運於應行府州縣皆按引以知其數輸賦於運使鹽道上計於鹽政皆積引以定其算歲周則收已行之引截角送部以待稽覈更頒新引

大清會典

雍正八年冊額臨江府屬四縣歲額銷鹽一萬九千一百六十五引新淦縣鹽鈔起存銀共一百二十一兩四錢四分四釐三毫零水脚銀一兩三錢九分六釐六毫

零戶口鹽鈔起運銀六十兩七錢二分二釐二毫遇閏加銀五兩七分二毫脚耗銀一兩三錢九分六釐六毫遇閏加銀一錢一分六釐四毫存留銀每歲額食淮鹽五千八百三十四引

江西大志

鹽牙舖稅銀兩向於蓼洲地方設有鹽牙凡係各屬小販來省買鹽鹽牙帶領商店買鹽若干每包取用稅銀一毫一絲以供在省文武衙門及文武科場所用食鹽價值康熙二十七年巡撫宋犖批行禁革嗣後此項永除

引鹽到省先將引自赴徽西兩匣互相查核鹽引數目與稽運水程相符方鈐兩河官給正副商綱圖記隨引賚投鹽道衙門驗明引目發課收貯鹽道將水程給發本商收領將鹽轉賣各縣小販卽填註小販姓名鹽數程途遠近日期到縣投繳如過限不繳水程卽係影射冒私

江西各州縣官督銷引鹽雖有定額每年惟據小販赴買商給水程護票回縣先將水程投縣驗明水程鹽數發賣每至奏期各縣將小販投過水程造冊繳報鹽道另造清冊同商領兩淮引目截角裝箋解赴鹽院奏銷以上俱雍正八年冊額

乾隆六年四月江西巡撫包括請定西鹽成本一摺言江省所轄一十三郡除廣信一府例食浙鹽贛州南安二府行銷粵引外其餘南昌十府屬俱食淮鹽年銷淮鹽額引三十餘萬道

西鹽奏摺

乾隆六年江西省所轄一十三府內除贛南二府向食粵鹽廣信一府向食浙鹽其餘南昌等十府均食淮鹽每年行銷額引三十七萬四千一百三十八道部議乾

隆十八年兩淮鹽行江西之南昌饒州九江南康建昌
撫州臨江吉安瑞州袁州 大清會典

按省志吉安舊淮鹽明洪武三年尙書嚴震直請以廣
東餘鹽鬻之江西南安贛州吉安臨江四府從之 吉志

嘉慶十九年新淦縣原額每年銷鹽四千八百二十六
引遇閏加銷鹽四百二引一分六釐零

今擬減三分應減一千四百四十七引八分

實額銷鹽三千三百七十八引二分

嘉慶二十一年閏六月縣令董瀾任內奉文擬減二分
應減九百六十五引二分

實額銷鹽三千三百七十八引二分遇閏以十三個月

派銷

新淦縣志卷十七

古蹟目錄

漢

上淦 石陽廢城 孔邛明宅 魏夫人壇 九仙臺

吳

封谿水口 巴邛

晉

陶侃讀書臺 洗墨池 化梭亭

五代宋

武帝源

梁

蕭子雲宅 泥溪

陳

新淦故城 巴邛郡故城

隋

巴山縣故城

唐

放生池 黃蘗館

南唐

觴池 制置戍 藏書巖

宋

雲泉精舍 樹根泉 戲魚堂 高士嶺 旌忠官田

岳武穆碑 劉仙井 涌月亭 願豐亭 秀溪別墅

蕭家峽 和樂堂 岡南梅月臺

元

金水亭 整駕亭 鳴水臺 慶源別墅 竹深亭

山間明月樓 石洞 盤谷

明

友鶴軒 水竹居 樵谷 待月樓 浩然堂

傾日樓 練公故宅 聳翠樓 梅溪 映雪齋

雞曙軒 雲谷 舒嘯軒 蘭室 湖陰書閣

文昌塔 流觴曲水石 肉身楠鍊鉢

國朝

施公講堂

共計六十處

新淦縣志卷十七

古蹟

蹟以古名景前修也上淦越邑名勝最久山川城池而外樓臺亭榭地以人傳指不勝屈彙著於篇與徐亭蘇圃爭烈矣作古蹟志

漢

上淦地在淦水上曰上淦韋昭注上淦越邑前漢地理志豫章郡有新淦縣淦水所出一曰淦泥也

說文

石陽廢城在玉笥山之仙居里遺址尙存西北去新淦

五十里 名勝志

按明一統志石陽東漢置縣屬豫章郡晉屬廬陵郡
隋省入新淦

孔邛明宅在玉笥山孔邛明奉母學道於此今屬峽江
明一統志

魏夫人壇在峽江驛南四十里玉笥山大秀峯頂相傳
南岳夫人嘗治於此黃庭堅有詩 名勝志

九仙臺在玉笥山明洪武時鄧雅送知縣范美解赴京
詩分題得九仙臺 明一統志

吳

封谿在新淦縣北二十里有聶友截梓樹板濤出搜神
後記臨水又西南逕封陽縣東為封谿水又西南流入
廣信縣南流注於鬱水謂之封谿水口 水經注

巴邛周瑜進兵潯陽破劉勲定豫章廬陵畱鎮巴邛 吳志

晉

讀書臺陶侃讀書處距縣東門里許為百花洲相傳晉
時陶侃讀書處 名勝志

洗墨池在城東百花寺側陶侃讀書臺其下曰洗墨泉

化梭亭侃微時漁雷澤得梭懸壁化爲龍去 名勝志

按舊志讀書臺在治東百華寺左嘉靖間尙書王英爲記化梭亭在侃母墓側洪武初重修張九韶爲記

載清江志

國朝順治甲午撫軍蔡士英訪陶遺跡檄縣宰潘哈及胡之琳修讀書臺分守道祖重光施閩章司李施維翰記前明胡儼及諸名公有詩

五代宋

武帝源在縣東四十里尙樂山上有宋武帝廟山經云

本禿女皇后廟禿女少孤後母苦之令牧豕於陂陂生藕因取食聚藕絲結爲履靈鵲啣於武帝殿帝異之取以爲后其說不經府志載之亦傳疑也或云唐光化中邑人劉輝以尙樂山羅公坑地形之勝創爲廟址而設宋武帝像與禿女并爲一祠遂稱宋武帝廟要無所考據云宋楊雯有詩 帶經堂詩話

梁

蕭子雲宅在峽江東南三十里 名勝志

按書苑云郁木山有梁蕭子雲宅宋黃庭堅有詩

泥溪在治西南梁天監元年南海刺史蕭勃舉兵入遣將軍歐陽頔屯兵苦竹灘用拒官軍卽此地也

陳書

陳

新淦故城本漢舊縣屬豫章南郡尉所居陳割屬巴山

郡開皇中廢郡縣屬吉州

元和郡縣志

新淦故城在今縣治北一百二十里

太平寰宇記

巴邛郡故城陳後主分新淦石陽

兩縣

置巴邛郡

輿地志

巴邛郡故城今隸峽江距縣治南八十里

豫章書

按峽江縣分於明嘉靖五年志中所載峽江卽新淦

地

隋

巴山縣故城距縣治六十里隋開皇十年移於今治其

城遂廢

太平寰宇記

唐

放生池在關皂山唐乾元二年詔諸道置放生池顏魯

公手書序銘詞畧云去殺流惠好生立辟率土之濱臨

江是宅寶勝如來疇庸允格真卿泐銘敢告凡百

清江志

黃蘗館治西南二十里綿峯山上唐權德輿過此有詩

新治縣志
卷之二
舊志

五代南唐

觴池南唐徐鉉與員外孟公流觴處徐有詩

騎省集

雙秀亭黃金鄉有雙秀亭南唐時邑人鄧佑擢童子科

其弟佶擢三禮科里人榮之爲築亭峽江上朱象記

名

勝志

制置戍楊吳天祐七年冬淮南節度判官嚴可求請置

十國春秋

制置使於新淦縣遣兵戍之以圖虔州

按明一統志都尉城都制置城均卽新淦故城

藏書巖在閤皂山宋齊邛讀書處

明一統志

宋

雲泉精舍劉克莊記休文游四方歸築精舍閤皂山面
峯挹澗手植葭杞梅竹無數其言曰山椒之雲自去自
來湖中之泉隨取隨有此予之所嗜不待有力可致故
予得而擅之休文楊氏名至質豐城人

清江志

樹根泉在茂才鄉距閤皂山十餘里有古樹僅存其根
而中空圍若井欄泉從中達極清冽不溢土人呼樹兜
井

清江志

按太平寰宇記閩阜山屬新淦南唐昇元二年吳鸞請立清江縣割新淦崇學鄉隸焉宋治平三年復析新淦茂才鄉隸焉而周必大閩阜山崇真宮記亦云閩阜蓋福地之第三十三也自漢末張道陵葛元丁令威皆有壇井故寰宇記以為神仙之館舊隸吉州新淦縣建臨江軍之後乃屬清江從民便也

戲魚堂在治東東山下宋劉次莊謫居臨江卜築東山

鑿池其前因名堂曰戲魚自號戲魚翁手摹淳化帖十

卷刻石置堂中時稱為戲魚堂帖明黃體方陳獻章

國朝施閏章翁方綱有詩明知縣王立穀有論舊志

高士嶺在治東三百步以次莊寓名舊志

旌忠官田韓世忠嘗議買新淦官田高宗聞之御札特

賜舊志

岳武穆碑宋紹興間武穆征虔駐師青泥市寺壁有詩

劉仙丹井其井在治南楓岡以上俱舊志

岡南梅月臺宋學士曾三聘別墅方一百六十畝曾自為記見藝文志

願豐亭在治南瀕江舊名四望宋高斯從改今名取杜

甫憂國願年豐之句涌月亭在縣治以上舊志

秀溪別墅在治東北二十里宋兵部侍郎曾宏迪別墅

有宸翰篆書秀溪二大字刻石各勝志

蕭家峽在郁木坑黃庭堅傳若金有詩舊志

和樂堂在玉峽蕭端虛兄弟建楊萬里有詩誠齋集

元

金水亭在金川館西今廢何中有詩知非堂稿

整駕亭在惠政橋南今廢舊志

鳴水臺在閤皂山知非堂集

慶源別墅在治東一名隆中山龔舜咨建吳澄記吳草廬集

廬集

竹深亭邑鵬溪廖隱君叔敏性嗜竹自號竹窻其孫中

如其祖屋傍多植美竹築亭其上因名傅若金記

山間明月樓在栖碧山龔舜咨取蘇軾辭意建樓吳澄

記草廬文集

石洞在一都元廬陵劉詵與郭德方坐溪石論文處

劉詵有詩桂隱集

盤谷李國隱居處取李愿盤谷遺意宋一俊有詩冰壺集

明

友鶴軒黃伯原建解縉記文毅集

水竹居在楓谷練子寧有詩玉屑集

樵谷饒子宏隱居處練子寧有詩玉屑集

待月樓在華光寺後縣令奚又灝記舊志

浩然堂在練公祠後李夢陽記崆峒集

傾日樓在練公祠後縣令楊意白建朱孟震記秉器集

練子寧故宅在東山下羅洪先自靖祠記公本新淦東

山人父伯尙遷三洲公及第復居淦城安志

聳翠樓在中洲胡進用建副使周謨有詩東臯集

梅溪在金灘宋惟學所居種梅蕃茂作軒臨溪榜曰梅

溪清隱金幼孜記文靖集

映雪齋在治南沂江孫孟修建慕孫康遺意金幼孜記

文靖集

雞曙山軒在治南鄒宜昇建金幼孜記文靖集

雲谷在治東御史姚伯良建為藏書別墅宋一俊有詩

冰壺集

舒嘯軒在縣城毛仲鼎建解縉記文毅集

蘭室書堂在治西釋蘭室讀書處周謨有詩東臯集

湖陰書閣在治西北二十五里蓮湖上朱文紹建羅洪

先有詩府志

文昌塔在治北五里淦水口關欄處明萬歷乙未縣令

王文燿建太子少保吉水曾同亨有記泉湖山房集

國朝嘉慶初縣令趙增率紳士捐貲重建學博張濤記新編

編

流觴曲水石在治南里許十才子黃榘等觴宴處朱秉

器遊宦餘談詳載其事亦見雜志舊志

肉身桶鍤鈔在大洋洲蕭公祠桶燬於火鈔在祠前舊志

志

國朝

施公講堂在讀書臺下邑令胡之琳建熊僕有詩舊志

新淦縣志卷十八

封爵目錄十一名

晉

新淦公諸葛長民

宋

巴邱侯檀韶

新淦侯王仲德

新淦男劉道憐

新淦縣袁顛

新淦男劉義宗

南齊

新淦侯蕭元琳

新淦伯劉善明

蕭梁

新淦公蕭大成

巴邱侯程靈洗

陳

巴邱公黃法氈

新淦縣志卷十八

封爵

列爵惟五所以勸有德褒有功也自晉迄陳食斯邑者或佐命而胙土苴茅或已封而加地進律計戶實食各有差等爰考續除畫以爲表以寄召棠郇黍之思云作封爵表

始封

世次

國除

郡屬

晉

新淦縣公

晉書本傳諸葛長民琅琊

本傳裕討毅以長民監大

按元和郡縣志新淦本漢

諸葛長民

陽郡人也有文武幹用劉裕建義與之定謀為揚武將軍從裕討桓元以功拜輔國將軍宜城內史於時桓散聚眾向歷陽長民擊走之又與劉敬宣破歆於芍陂封新淦縣公食邑二千五百戶

尉留府事詔以甲杖五十人入殿長民驕後不恤政事裕深疑之輕舟徑進潛入東府伏壯士丁昨於幘中引長民進語時自後拉而殺之與尸付廷尉初長民常夜眠驚起跳踉如與人相打毛修之與同宿見之問故答曰正見一物甚

舊縣南部都尉所居晉屬豫章郡今屬臨江府

宋

巴邛縣侯

檀韶

宋書本傳檀韶字令孫高平金鄉人也世居京口以平桓立功封巴邛縣侯食邑五百戶高祖受命以佐命功增八百戶永初二年卒於京邑時年五十六追

齊受禪國除

黑而有毛脚不分明未幾伏誅

按巴邛本新淦之揚名鄉漢永元間分置隋開皇十年省巴邛又入淦

贈安南將軍
加散騎常侍
子緒嗣緒卒
無子

新淦縣侯

王仲德

宋書本傳王
懿字仲德大
原祁人自言
漢司徒元弟
幽州刺史懋
七世孫也武
帝伐廣固仲
德為前鋒大
小二十餘戰
每戰輒剋及
盧循寇逼敗
劉毅於桑落
帝北伐始還
士卒創痍賊

宋書志屬江
州豫章郡

新淦縣男

眾十萬抽糧
百里奔敗可
歸者咸稱其
雄功冠諸將
封新淦縣侯
武帝踐阼思
佐命功增邑
二千二百戶
元嘉十五年
卒諡曰桓侯
於廟立白狼
童子壇每祭
必祠之子正
修嗣為家僮
所殺

宋書宗室傳
長沙景王道

齊受禪國除

封爵

三

劉道憐

憐高祖中弟也義熙四年鮮卑侵逼自彭城以南民皆保聚山陽淮陰諸戍並不復立道憐請據彭城以漸修剏朝議以彭城遠使鎮山陽進號征虜將軍以被索度真功封新淦縣男食邑五百戶永初三年六月薨年五十五追贈太傅

新淦縣子

袁顛

子義欣嗣

南史袁顛字國章陳郡陽夏人大尉淑兄子初為豫州主簿襲豹爵景和元年任以朝政遷為吏部尚書改封新淦縣子食邑五百戶後違叛斬首流尸於江子戡昂戡戡伏誅

按南史作新塗縣子考沿革志唐始於吉州置新塗縣以前皆新淦也為改正

新淦縣男

劉義宗

長沙景王傳後道憐第四子義宗初為高祖所愛字曰伯奴賜爵新淦縣男永初元年進爵為侯元嘉八年坐門生杜德靈放橫打人還第內藏義宗隱蔽之免官二十一年卒追贈平北將軍諡曰惠侯子懷侯玠嗣為元凶所殺無子以

昇明二年齊受禪國除

攷宋史道憐封新淦男義宗襲封進爵為侯則為新淦無疑南史作新淦誤

南齊

新淦縣侯

蕭元琳

乘子承紹封

齊書豫章文獻王傅子廉字景謫卒贈侍中諡哀世子子元琳嗣梁武帝受禪詔曰褒隆往代義炳彝則朕當此樂推思引前典豫章王元琳故巴陵王昭秀胄子同齊氏宗國高武嫡

梁受禪降王封為縣侯



新淦縣伯

劉善明

嗣宜并井邑
以傳世祀降
新淦縣侯五
百戶
齊書本傳平
原人懷珍族
弟元嘉末青
州饑荒善明
家有積粟躬
食餽粥開倉
以救鄉里百
姓呼其家田
為續命田大
祖踐阼以善
明勲誠遣使
拜授封新淦
伯邑五百戶
建元二年卒

蕭梁

新淦縣公

蕭大成

諡烈伯子滌
嗣

南史大成字
仁和簡文第
八子初封新
淦公太清三
年簡文即位
封郡王大寶
元年奔江陵
湘東王
南史程靈洗
字元滌新安
海寧人少以
勇力聞步行
日二百里元
帝授譙州刺

巴邛縣侯

程靈洗

史資領新安太守封巴邛侯邑五百戶陳光大二年卒於州年五十五贈鎮西將軍諡曰忠壯大建四年詔配享高祖廟庭子文季嗣

陳

巴山縣公

黃法氈

陳書本傳黃法氈字仲昭初克筓屯梁元帝承制授

起猛將軍交州刺史資領新淦縣令封巴山縣子邑三百戶承聖三年進爵為侯邑五百戶陳天嘉二年周迪反法氈與吳明徹討迪於工塘迪平法氈功居多廢帝即位進爵為公大建八年十月薨時年五十九贈侍中諡曰威子玩嗣

		
<p>Faint vertical text in the left column of the middle row.</p>	<p>Faint vertical text in the middle column of the middle row.</p>	<p>Faint vertical text in the right column of the middle row.</p>
		